

Date – 01/06/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Mizorama Rajya Sabha seat 1 hnawhkhat tura inthlan hriattirna chu vawiin khan Mizoram Legislative Assembly Secretary chuan a tichhuak .
2. Lei da zel tur ven kawnga sorkar laipui hmalakna 'Khet Bachao Abhiyan' chu vawiin khan Larsap General (Retd) Vijay Kumar Singh-an a hawng.
3. Vawiina Prime Minister Narendra Modia leh Myanmar President U Min Aung Hlaing te inbia chuan Kaladan Multi Modal Transit Transport Project a hma thei ang bera thawh zawh an remti.
4. Malaysia sawrkar chuan vawiin atang khan naupang kum 16 hnuailam social media account neih a khap.

<><><>

RS ELECTION NOTIFICATION

Mizorama Rajya Sabha seat 1 hnawhkhat tura inthlan tur hriattirna chu vawiin khan Mizoram Legislative Assembly Secretary chuan a tichhuak a,

Rajya Sabha inthlan vote thlak hi tun thla ni 18 ah neih tur a ni a, rampumah Rajya Sabha seat 24 hnawhkhat tura inthlan chuh tum te tan hian vawiin atang khan hming pek luh hun hawn tan a ni a, tun thla ni 8 thleng thehluh hun hawn a ni ang.

Mizoram bakah Manipur, Meghalaya leh Arunachal Pradesh ah te seat 1 theuh, Andhra Pradesh, Gujarat leh Karnataka seat 4 theuh leh Rajasthan leh Madhya Pradesh-a seat 3 leh Jharkhand a seat 2 hnawhkhat turin inthlan hi neih tur a ni.

Hetihlai hian state 3-Maharashtra, Tamil Nadu leh Odisha Rajya Sabha by election neih tur atana hriattirna chu vawiin hian chhuah a ni bawk a ni.

Rajya Sabha inthlan vote thlak hi tun thla ni 18 ah neih tur a ni a, hemi ni vek hian vote thlak zawhah vote tla te chhiar nghal a ni ang.

<><><>

IMPCC

Central sawrkar media unit hrang hrang leh Mizorama sawrkar department thenkhatte thawhhona Inter Media Publicity Coordination Committee IMPCC chu Akashvani Aizawl Conference Hall, Tuikhuahtlangah an thukhawm a.

He meeting-ah hian Akashvani Aizawl, Press Information Bureau, Doordarshan Kendra Aizawl, Department of Information & Public Relations leh state media hrang hrangte tha zawka an thawhho dan tur sawiho a ni a. Central sawrkar scheme chi hrang hrangte pawh a hlawkpuitu tur ngei beng thleng thei tura hriattirna tha zawk a awm theih nan te, sawrkar project thawh mek leh a hlawhtlinna chante mipuiin zau zawka an hriat theihna tura tan lak dan tur sawi ho a ni a. Tunlai khawvel hmasawnnain a ken tel digital media lama tan lak a pawimawhzia te, print media mai ni lova social media platform atanga mipuite hnena thuthar thehdarh kawnga hma lak pawimawhzia te sawiho a ni a. Thuthar dik lo laka mipuite an chiaih loh na tura rang taka hmalak dan kawng te sawiho a ni bawk.

Vawiin meeting hi Doordarshan Kendra (DDK) Aizawl Director Pu Nampibou Marinmai-a'n a kaihruai a. PIB Guwahati Joint Director Pi Pavni Gupta chuan rawn telpuiin central leh state sawrkar department hrang hrangte pawh he meeting-ah hian an tel a ni.

<><><>

KHET BACHAO ABHIYAN

Lei da zel tur ven kawnga sorkar laipui hmalakna 'Khet Bachao Abhiyan' chu vawiin khan Larsap General (Retd) Vijay Kumar Singh-an tun thla chhunga hman turin Lok Bhavan, Aizawlah a hawng.

Khet Bachao Abhiyan hi Ministry of Agriculture and Farmers' Welfare kaltlanga hmalakna a ni a. Hemi hmang hian lei tak dan zirchianna neih hmasak zet hnuah inpawlh rual leh him zawk hmanga lei tha hman bakah leilung nena inrem taka lo neih chu ngaihpawimawh a ni.

Larsap chuan thar tam duh avanga nasa taka chemical fertilizer leh rannung thahna hlo hman thin ten ram leilung leh hriselna thlenga nghawng thalo a thlen thu sawiin, hemi laka him theih nan hian a taka ke pen chhuah a tul tawh a ni, a ti a. Prime Minister Pu Narendra Modi an National Mission on Natural Farming a lo tlangzarh tawh thu sawiin, lo neih dan leh thar chhuah a lo him zawk theih nan leilung mila lo neih chawilar deuh deuh a tul thu a sawi.

Larsap chuan Mizoram chu agriculture sector-a inngnat nasa tak a nih thu sawiin, mithiamte leh KVK te rawn chunga theihtawp chhuaha hma lak phawt chuan ei leh bara intodelh mai bakah kuthnathawktute sum laklulh a pung thei dawn a ni, a ti.

VC

Central Agriculture University (CAU), Imphal Vice-Chancellor, Dr. Anupam Mishra an 'Khet Bachao Abhiyan' chungchang a sawi dan chuan Buh leh thlai thar chhuah kawnga leilung leh mihring tana him lo hman thinte titem tura tanlak na tur a ni a, Khet Bachao Abhiyan chhungin sawrkar laipui scheme pawimawh leh hman tangkai dan zirtirna kalpui a nih dawn a ni. Loneitute hmasawn zel nan tanrual a pawimawh thu sawiin, soil health card, kisan credit card, farmers' ID leh crop Insurance-te ngaihpawimawh deuh deuh a tul thu a sawi bawk.

Vawiin hun hman hi Agriculture and Farmers' Welfare Minister Pu P.C. Vanlalruata chuan a telpui a. Line department hrang hrang official-te bakah loneitute an tel a ni.

<><><>

SNA SPARSH

SNA SPARSH hmanngu Department Administrative Head-te pualin SASCI & SNA SPARSH chungchang Meeting cum Workshop vawiin khan Aizawlah buatsaih a ni a. Chief Minister Pu Lalduhoma, Finance Minister ni bawh chuan a telpui.

Thusawiin Chief Minister chuan, SNA SPARSH chu sum hnar lian ber an kalpuina anih angin a hmanngu Department ten chiang taka an hriat a tul a. Kum liam ta aia kuminah tha zawka kalpui theih nan meeting cum workshop pawh hi buatsaih a ni a ti a, nikum khan an thawhhona a that avangin SASCI Part 9 ah Efficiency in Financial Management incentives cheng vbc 350 an dawng a. Kuminah hian SASCI Part tina reform-link incentive awm zawng zawngte dawng thei khawpa tan lak an duh a, chuvangin Mizoram sorkar chuan Administrative Head zawng zawngte chu Charter of Financial Advisers hnuaiah (Financial power) thuneihna pek an ni a. Hei hian Administrative Approval leh Expenditure Sanction pek chhuah kawngah awlsamna min thlen dawn a ni a ti.

He workshop hi Institute of Government Accounts & Finance leh Mizoram sorkar Finance Department te tangkawpin an buatsaih a ni.

<><><>

100 DAYS CAMPAIGN

Ministry of Health & Family Welfare hmalaknaa TB umbo beihpui thlak mek "100 Days Campaign" chu ngawrh taka kalpui mek a ni a, TB vei 370 vel hmuhchhuah a ni tawh.

He campaign hi Mizorama district zawng zawngah kalpui vek niin TB hluar theihna hmun bika ngaih "High Risk Village/Ward" te chu ngaih pawimawh a ni a. Heng hmunah te hian mipui zawng zawng screen vek tur a ni.

Kan corr report lo ngaithla ang.

VC

TB umbo beihpui thlak mek "100 Days Campaign" hi kumin March ni 24 atang khan kalpui tan a ni a, hemi hnuaiah hian TB vei awlsam bika ngaih zunthlum nei, BP sang, meizu, zu in mi, kum 60 chunglam, Chuap TB damlo chenpui te phei chu endik ngei ngei tur an ni.

National Health Mission Mizoram hnuaia National TB Elimination Programme chuan bul an tan atanga thlahlui May 24 thleng khan campaign hi a kalpui a, hemi hun chung hian Screening camp vawi 340 neih a ni a, X-ray hmanga endik zat hi mi 25509 an ni a, TB vei hmuhchhuah tawh zat chu mi 370 an ni a, Chuap TB damlo chenpui zinga TB venna (TPT) chu mi 488 hnenah pek a ni tawh bawh.

<><><>

ASF

Vawk pul hri, African Swine Fever (ASF) avanga kum 2024 chhunga vawk suat neitute hnena zangnadawmna pek tur cheng nuai 2195 chu vawk neitute hnenah pek a ni tawh a; sorkar laipuah kum 2025-a vawk suat neitute hnena pek tur zangnadawmna cheng nuai 194 vel dil lek mek a ni.

AH&Vety department hotute chuan Akashvani News Aizawl zawhna chhangin, ASF vanga vawk suat neitute hnena zangnadawmna pek tur chu central sorkar leh Mizoram sorkarin za zela 50 ve ve-in an intum sem avangin sorkar laipua zangnadawmna tura chhut atanga zaa 50 dil thin a ni a, hemi atanga sorkar lipuiin a rawn pek ang zat chiah hi state sorkar chuan a pe ve thin. Kum 2024 chhunga vawk suat neitute hnena sorkar laipua zangnadawmna dil hi a vaiin a rawn pek loh avangin zangnadawmna pek zawng zawng hi zaa 89 vel a ni, an ti.

(BYTE - AH&Vety Dy.Director (LH) Dr Thangzadinga)

Kum 2024 chhunga vawk suatte hnena zangnadawmna pek tura chhut hi a vaiin cheng nuai 2491 a nih thu sawiin AH &Vety department hotute chuan, hetihlai hian sorkar laipui chuan state sorkarin a dil ang zat a rawn pek loh avangin a vaiin cheng nuai 2195 sem a nih thu an sawi. Nikum 2025 chhunga vawk suat 3672 neitu chhungkaw 936-te hnena zangnadawmna pek tur chu Financial year 2026-27 annual action plan-ah telhin February, 2026 khan central-ah thawn a ni a, a vaiin cheng nuai 194 vel dil mek a ni.

ASF vang hian Mizorama vawk vulhtuten harsatna an tawh nasa hle a, kuminah pawh hmun thenkhatah a leng leh tawh. Kum 2024 khan ASF vanga vawk suat hi 26,600 chhinchhiah a ni a, chungte chu - Kg 15 hnuailam 3367, kg 15-40 inkar 4993, kg 40-70 inkar 6420, kg 70-100 inkar 6155 leh kg 100 chunglam 5665 an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

LIVESTOCK INSURANCE

Ran vulhtuten an ran vulhte an thih palh pawha sum an hmuh theihna tura Mizoram sorkarin National Insurance Company (NIC) thawhpuia sorkar laipui scheme National Livestock Mission (NLM) hnuai a kalpui 'Animal Insurance'-ah nimin thleng khan vawk 2774, bawng 6 leh kel 7 insurance tih a ni tawh.

NIC hotute hnen atanga Akashvani News Aizawl thudawn danin, ran insurance tihnaah hian nimin thleng khan vawk vulhtuten an vawk vulh lai 2774 chu insurance an tihsak tawh a, Aizawl district-ah vawk insurance tihsak 1550 awm tawhin a tam ber a; Siaha district-ah insurance ti an la awm lo. Bawng insurance

tihsak hi Aizawl district-ah 5 leh Serchhip district-ah 1 a ni a; kel insurance tihsak tawh 7 hi Lunglei district-a mi vek an ni.

(VOICE CAST - *Animal Insurance* hi vawh, bawng, sial, kel leh beram-ah a tih theih a, insurance tihsak rante hi khuarel chhiatna leh hri avanga an thih chuan ranvulhtute hnenah NIC hian an ran vulh hlutna hua chhât pawisa an pe dawn a - an len dan a zirin vawkah hian Rs 7200-24000 inkar hmuh theih niin, bawng leh sialah hian Rs 14000 - 48000 leh kel leh beram-ah hian Rs 1680 - 5600 hmuh let theih a ni. Ran insure te hi an lo thih palh a nih chuan ran vulhtute hian kim takin insurance pawisa dilna atan pawimawhte an neih kima, insurance an claim a nih chuan NIC hian a rang thei ang berin an chinfel sak tur a ni a, NIC hian an tih turte ni 15 chhunga an ti zo hman lo a nih chuan ran vulhtute hnena sum an pek tur hi zaa 12-in a pung dawn a ni))

<><><>

12 YEARS OF NDA GOVT

Prime Minister Narendra Modi kaihhruai NDA sawrkar kaltlanga tanpuina dawngtu Darzo khaw mi ten an chhawr tangkai thu an sawi.

Hnahthial-a Akashvani Correspondent Amy in sawrkar laipui scheme chhawr tangkai tu hrang hrang a kawmna ah mipuiten an chhawr tangkai thu an sawi a, hamthatna hrang hrang an dawn chuan an khawsak a ti awlsam an ti a, Jal Jeevan Mission hnuai ah in chhungah tui an herhhaw thei chu lawmawm an tih thu Lalrikimi Darzo khua chuan a sawi a, JJM hnuai tui an chawi a ngai ta lo ringawt pawhin an khawsak a tih awlsam phah niin a sawi.

Byte of Beneficiary

Prime Minister Narendra Modi kaihhruai NDA sawrkar hian kumin hian a kum 12-na a tling a, hemi pual hian Akashvani News Aizawl chuan sawrkar laipui hmalakna hrang hrangah mithiamte a kawm a, hengte hi Akashvani News Aizawl youtube channel leh Social media hrang hrangah hmuh leh ngaihthlak theihin a awm a ni.

<><><>

MYANMAR KMMTTP

Vawiina Prime Minister Narendra Modia leh Myanmar President U Min Aung Hlaing te inbia chuan Kaladan Multi Modal Transit Transport Project a hma thei ang bera thawh zawh an remti. New Delhi-ah PM Modia leh President Min U Aung Hlaing te hi inbiain India leh Myanmar inkara thil pawimawh chi hrang hrang an sawidun a. Union Foreign Secretary Vikram Misri chuan ram pahnih hruaitute hian thawhdunna tha leh zual siam an remtih bakah sumdawnna leh sum peipunna, hmasawnna hnaa thawhdun, hriselna, zirna leh energy lamah tha zawka thawhdun an remti a ti a. Mipuite inkalpawhna tur tha an ngaih pawimawh thu sawiin Kaladan Multi-Modal Transit Transport Project chu a hma thei ang bera thawh zawh nise an ti a Sumdawnna leh eibazanwna lama thawhdunnate, ralthuam leh venhimna khawih thilte, ramri chungchang bakah mipuite inpawhna tura nunphung inthlengtawn chungchangte an sawidun a ni.

Pu Modia chuan Myanmar-in ram zalen leh mahnia inrelbawlna tha nei tura thuneihna a neih chu a zah sak thu sawiin ram pahnihten an himna ti derthawng thei

chetlakna hrang hrang atan an ramchhung ve ve hman an remtih loh thu an sawi bawk a ni.



MALAYSIA

Malaysia sawrkar chuan vawiin atang khan naupang kum 16 hnuailam social media account neih a khap. Khawvel pumah tleirawl leh naupangte online-a thil tha lo laka venghim tura hmalakna kal mek chu vawiin atang khan an kalpui ve tan a. Malaysia bakah hian Australia, Brazil leh Indonesia te chuan naupang tana social media account neih an khap thu an lo puang tawh a ni.

